

四明叢書

張宗祥



先聖大訓卷之五

宋慈溪楊簡敬仲輯

小辨第三十六

公曰寡人欲學小辨以觀於政其可乎子曰否不可社稷之主愛日曰不可得學不可以小辨是故昔者先王學齊大道以觀於政天子學樂辨風制禮以行政諸侯學禮辨官政以行事以尊事天子大夫學德別義矜行以事君士學順辨言以遂志庶人聽長辨禁農以行力如此猶恐不濟奈何其小辨乎

孔子進言於公多矣公終不明故此又欲學小辨以觀政意謂孔子之言大難行其餘人辨論雖不如孔子之大意以爲可行故欲學之疑而問於孔子子曰否不可社稷之主愛日惜陰謂業業修德學禮豈遑學小辨乎不可學不可以小辨記者再書曰以孔子默然良久乃有是言故再書曰周書立政篇再書周公曰者亦以默然良久也於是知當日孔子聞公言痛念公心之不明故爲之默然者良久也愛日之言亦痛切矣公之不明如此孔子亦不棄絕復啟之曰

先王學齊大道以觀於政齊一也孔子曰君子學道則愛人小人學道則易使子游因弦歌而舉以爲證是孔子以樂爲道也子又曰成於樂此言大道而亦曰樂孟子亦曰樂則生矣生則惡可已也蓋人心卽道故舜曰道心起而爲意始有思爲始流於邪樂者中正之音故足以感人中正之道心孔子曰移風易俗莫善於樂周禮大師教六詩曰風曰賦曰比曰興曰雅曰頌風者詩之始言風則賦比興雅頌盡包之矣辨詩良難惟聖人能辨之孔子曰人而不爲周南

召南其猶正牆面而立也與詩之道無所不通如此
先儒之爲詩者不勝其紀而不正牆面者不多見然
後知辨詩亦良難矣辨風卽辨詩也詩卽樂和樂卽
知道禮者此道此道之節文達諸事謂之政政者正
也諸侯所學者此禮也所辨者此政也所行者此事
也以尊事天子者亦此事也此道也大夫所學者此
德所別者此義所矜持者此行士所學者此順所辨
古言以遂好善之志者此言此志也庶人聽其長之
命辨其禁令者此禁也農以行力此力也何則道一

而已不容有二也二則邪矣失正矣學小辨者則離道矣

公曰不辨則何以爲政

意謂彼雖小亦辨明是非可否也不辨明何以爲政
子曰辨而不小

君子非無辨惟不小爾

夫小辨破言小言破義小義破道道小不通通道必簡
公謂小辨亦有義亦有道故欲學之孔子於是明言
小辨之破言破義破道道小則必不通必有礙通道

則必簡易公不知其簡易故心謂難

是故循弦以觀於樂足以辨風矣爾雅以觀於古足以
辨言矣傳言以象反舌皆至可謂簡矣夫道不簡則不
行不行則不樂夫十棋之變由不可既也而況天下之
言乎

甚矣夫正音之妙也中正和平至樂油然而生生不
知其所始亦不知其所成舉弦則金石絲竹匏土革
木之音同矣六詩之正卽此正也卽此和平之妙也
道心之明者知之矣至易也至簡也古言多矣邇近

乎雅正之言則言可辨矣爾邇也夫傳言皆以象其
所欲言者然天下之象無窮故天下之言亦無窮然
反舌不言則天下之事理言象皆到而無餘蘊至到
也到無所到人之常言曰至曰到因以爲言明其極
也不假一言豈不甚簡惟由是而行謂之道惟由是
道而行則通而無阻無所不通故樂不由是簡易之
道則必有礙而不行之處至於不行則不樂矣樂無
二樂油然而有樂於中而非邪卽道卽天子所學之樂
卽禮卽政卽德義卽順豈不至一而簡夫十棋之變

猶不可盡而況天下之言乎明不得簡易之道必不能盡通而無阻

曰微子之言吾一樂辨言子曰辨言之樂不若治政之樂辨言之樂不下席治政之樂皇於四海夫政善則民說民說則歸之如流水親之如父母諸侯初入而後臣之安用辨言

甚矣夫辨言之足以惑亂人心敗亡國家也蓋小辨之言似有理而實非似有利而實害自三代之衰以來士大夫不陷乎是者有幾漢唐略定而多亂國祚

亦短此非孔子善於開陳於公必樂於辨言孔子如此善言明白公如此開悟公猶終於不明而沉於無孔子辨明則天下後世無開明之日矣孔子之時所謂小辨者特未知道爾猶不至如秦漢以來士大夫多妄論也自唐以來滋甚夫小辨之言至於使人主聽之而樂豈不爲大害哉小辨之說其權術之說乎近利之說乎似是而實非之說乎權術近利而實非正乎不正乎不正則民說乎不說乎正則民說歸之如流水親之如父母諸侯初入以鄰國之禮至其後

心說其德自然臣服之夫四海之民咸歸之親之如流水如父母諸侯比肩而卒臣之豈權術小辨所能致哉

公曰然則吾何學而可子曰行禮樂而力忠信君其可乎公曰多與我言忠信而不可以入患

公謂多有與我言忠信者而公思忠信不可以入患難當患難勢須變詐乃免故疑而問

子曰毋乃旣不明忠信之備而又倦其居則不可有明忠信之備而又能行之則可立待也君朝而行忠信百

官承事忠滿於中而發於外刑於民而放於四海天下其孰能患之公曰請學忠信之備

孔子謂慮忠信之不可入患者旣不明忠信之患備又倦於居忠信故忠信不可得而有諸己若明忠信之患而備之又能行之則可立待也立待其效也下所言者其效也如此則何患之有

子曰惟社稷之主實知忠信若丘也綴學之徒安知忠信公曰非吾子問之而焉也

焉問之也

子三辭將對公曰彊

避子曰彊侍丘聞大道不隱丘言之君發之於朝行之

於國一國之人莫不知何一之彊避

夫忠信者不欺詐誠實而已人之所共知豈有孔子而不知矧國君請問宜卽以對而曰惟社稷之主實知忠信臣綴學之徒安知忠信公三問而子三辭何也忠信卽大道而忠信不過不詐僞誠實而無他慮公忽之而不知其爲大道故不可輕言首曰惟社稷之主實知忠信亦欲公知忠信在己也及將對公極其敬曰必避席以聽彊剛也堅必之辭也子曰必侍公側必不敢失臣禮言大道不隱臣言之者明忠信

卽大道常人雖知忠信之爲不僞而不知不僞之卽大道也孔子故云大道不隱又云君發忠信於朝行之於國一國莫不知君之忠信何一之彊避因公彊避之言而及此謂人皆知公忠信則公皆不得而避雖欲避一人亦不得也

丘聞之忠有九知知忠必知中知中必知恕知恕必知外知外必知德知德必知政知政必知官知官必知事知事必知患知患必知備若動而無備患而弗知死亡而弗知安與知忠信

安謂之知忠信

內思必曰知中中以應實

曰知恕內恕外度曰知外外內參意曰知德德以柔政
曰知政正義辨方曰知官官治物則曰知事事戒不虞
曰知備毋患曰樂樂義曰終

獨曰忠者明忠信無二道忠本無可言而敘陳九知
何也方明其爲大道當詳其言以著其大忠者中心
也其中若何欲公內思而知之中本無物忠亦無說
強名曰道變化四發發而爲恕中實以應是謂知恕
由恕而達外度無愆是謂知外參其齊之訛歟古齊
爲參內外意齊融明齊一是謂知德德政和柔曰知

政德義薄正官各有方曰知官官治事物物各有則
曰知事事戒不虞曰知備有備無患曰樂所樂者義
非樂乎私言至于此則終盡無復可言者矣初曰九
知終益其二曰樂曰終嗚呼聖言適意而言亦破定
見示無定言

用兵第三十七

公曰用兵者其猶不祥乎

由猶

子曰胡爲其不祥也聖人

之用兵也以禁殘止暴於天下也及後世貪者之用兵
也以刈百姓危國家也公曰古之用兵何世安起子曰

傷害之生久矣與民皆生公曰蚩尤作兵與子曰否蚩尤庶人之貪者也及利無義不顧厥親以喪厥身蚩尤悖愆而無厭者也何器之能作蜂蠆挾螫而生見害

蚩尤如蜂蠆螫人故生而見害於人

而校以衛厥身者也

校者以木爲欄格也所以爲衛也言蚩尤不能如校以衛其身

人之生有喜怒故兵之作與民皆生

怒甚則用兵刀

聖人利用

而彌之

彌弭通用弭止也聖人用兵利民而用之終於弭止也

亂人興之喪厥身